

DIARII

I OTTOBRE MDXXXII. — XXXI MARZO MDXXXIII.

1 *Del mexe di Octubrio 1532.*

A dì primo Octubrio. Luni. Hessendo eri intradi li cai di Quaranta nuovi a la banca di sora, *videlicet* sier Vicenzo Marzello, sier Lunardo Michiel et sier Batista Barbaro, et li cai dil Conseio di X sier Sebastian Justinian el cavalier, sier Pandolfo Morexini, sier Lorenzo Bragadin, stati altre fiate; questa matina introe in Collegio sier Piero Lando, sier Nicolò Bernardo et sier Hironimo da cà da Pexaro savii dil Conseio, sier Francesco Vener, sier Antonio Loredan savii a Terra ferma, et il terzo sier Marco Antonio Grimani intrò il zorno seguente, perchè sier Tomà Donado va podestà a Vizenza, in loco del qual dito Grimani è sta fato et ha voluto star *etiam* questa matina per poter venir in Pregadi fino el va via, il che è contra le leze, *tamen* venirà. Intronò *etiam* savii ai Ordensi sier Andrea Loredan, sier Zuan Paulo Corner, sier Zuan Morexini, sier Antonio Erizo.

Dil Zante fo lettere di sier Matio Barbarigo provedor di 10, di Corfù, et dil capitano zeneral da mar, et io vidi una di domino Jacomo Saguri di 10 dal Zante scritta a sier Zuan Francesco Badoer fo provedor de lì che dice cussì: Tenuta la presente fin a di 10 sepembrio. Per lettere ho da Napoli di Romania dal magnifico mesier Alvise Contarini baylo me scrive, per lo aviso se ha dal castelan de Castri che li scrive che in quel golfo a di 5 ditto passò da vele

55 et andavano a la volta de Cavo Colona in gran pressa, et per avanti zorni 4 dize aver passato in quelli zorni 5 et 6 et 10 vele in tre fiade, e tutte andavano a la volta de Cao Colona con presteza et se tirava a la volta dil Stretto. Et più dize ditto messo li zorni 6 avanti el pasase ditta armada vene le fuste luntan da Napoli mia 10 et prese tre barche con persone 15 iera dentro in ditte barche, altri corsari non se intendeva esser in quelli mari. Zerca l'armada spagnola el principe signor Doria se trovava in le acque di Modon con galie 39 e fuste 6, et il galion de Cristoforin Doria con tre altre nave, et aspettava le altre nave le qual se trovano qui al porto dil Zante, le qual nave se partino de qui eri de zorno, et per tempo de ostro et syroco è ritorname in questo loco et sorse al porto a sol a monte, si che ditta armada, cussi nave come galie, non è per passar Coron, *imo* tien di zerto sia per meter campo sotto Coron per i gran preparamenti che han fatto, pur assà artellarie per meter in terra, pali di ferro, piconi, bailli, scale infinite, che prenderano el ditto loco. El ditto signor Andrea Doria aspetta le nave con gran desiderio azò possa andar a bon hora sotto Coron, et il suo tardar sarà vantazion di quelli di Coron e Modon, *tamen* questi spagnoli teguino di certo prenderano ditta terra di Coron e Modon. Io l'ho per difficile questa impresa.

Da Udene di sier Thomà Contarini locotenente di la patria di Friul, di 28 Septembrio, con avisi de turchi, quali hanno preso la cità de Cil che si rese, et poi ha usato gran crudeltà,